

晚

晴

移

詩

匯

晚晴簃詩匯卷一百四目錄

曹振鏞 四首

錢棨 五首

玉保 六首

王友亮 六首

翁元圻 一首

曾燠 十四首

汪學金 十五首

朱蘭馨 二首

徐昆 二首

張經田 二首

劉錫五 三首

陳廷慶 二首

臧學標 八首

楊倫 三首

錢塘 三首

沈在廷 八首

吳昇 九首

李苞 八首

許乃來 一首

劉東里 二首

李符清 五首

翁咸封 五首

晚晴詩匯卷一百四目錄

李簡一首

楊興植三首

朱霈八首

張秉鈞二首

李懿曾三首

晚晴簃詩匯卷一百四

徐世昌

曹振鏞字懌嘉號儷笙歙縣人乾隆辛丑進士改庶吉士授編修官至武英殿大學士加太傅諡文正有綸

閣延暉集話雲軒詠史詩

詩話嘉慶三年文正以詹事督學廣東父憂歸服除
祖母歿期年始至京補官仁宗稱其孝道光間大
考翰詹詩題巢林棲一枝眾皆不知所出公在軍機
直廬謂同官曰此左太冲詠史詩也誦全詩不謬一
字宣宗閱卷怒詞臣不學欲再試之越日召見公
詢公詩題出處公以不知對上曰汝亦不知無怪
若輩也遂已或問公何以言不知公笑曰吾知亦偶
然耳上再以他題詢其能一一對耶知此何足道
性靈於兄弟師友間流連往復真摯動人不以工拙
論也

攬鏡詞

人憐漸憔悴壯志猶軒舉攬鏡忽愁生心知口不語

漢將軍柏歌

戔戔天封觀屹屹嵩陽宮怒濤聲沸沸偃蓋圓童童擎雲
攫雨恣奇怪老皮張展橫晴空大者根堅介於石小者枝
舞神如龍獨惜三株火其一不然鼎足而峙天之中當年
樹旁駐仙蹕千乘萬騎羣候從登壇拜將寵錫秩直欲使
爾任折衝豈知將軍不好武靜含秀色森古容回天轉地
自智勇洗兵銷甲何英雄幹聳十丈氣鬱鬱葉鋪千疊光
重重惟名與器不可假詎要人爵貪天功嗟爾將軍柏何
如大夫松貞心共守壯貌古勁節肯受頭銜封不惟其人
惟其樹秦皇漢武將毋同可憐驪山一炬成焦土茂陵有
客悲秋風岱松已亡歎枯朽此柏無恙猶青葱我來爲揖

客眺賞心神融莫言將軍何乃故敢不封殖忘角弓

過蘇齋師寓齋感賦

空庭寥落夢吟魂每過潸然漬涕痕昔侍門牆呼老友

進謂師以老友呼之

今趨第宅對孤孫可能點筆神光護祇有遺書

手澤存石墨樓高回首望儘教腹痛向黃昏

當年詩境是詩壇多少人來劒鋏彈恩怨誰堪追俠烈炎涼何意到儒酸五千文字撐腸易八百孤寒下淚難蘇米齋中悲寂寞殘編散帙孰重刊

錢棨字振威號湘舫長洲人乾隆辛丑一甲一名進士

授修撰歷官內閣學士兼禮部侍郎銜有湘舫詩藁

詩話鄉會殿三試皆第一世謂三元明舉進士科八十八三元僅得商文毅一人國朝舉進士科一百一十三元亦惟湘舫及陳蓮史方伯二人而已湘舫自侍從陟卿貳視學滇南遽卒於官年未中壽詩和平

蘊藉汪稼門爲作序謂天假之年不難爲王沂公誠重惜之也

題葉仙將軍畫卷

芙蓉城主舊時情
石室桃花夢未成
仙佛至今眞不滅
英雄從古愧徒生
滿庭香雨拈金粟
一枕松風聽玉笙
擬約山中同採藥
韓康何必爲逃名

題詒晉齋畫梅冊子

記曾踏雪銅坑路
初月昏黃舊崦西
醉眼倦開香似海
春風纔到玉成蹊
一枝影雜檀欒好
一片石寒生煙靄低
今日畫圖重省識
江鄉宛轉夢淒迷

鐵笛歌

刻有裂石穿雲四字款
云米圖南造于三弄處

會稽詩老儕
虞揭樂府歌
成聲激烈卷衣甲
帳月華涼照徹
寒笛寸迸裂
傳聞緱氏冶
師名范出玲瓏
土花纈季長

才調廣平心留響人間肯磨滅跌宕詞場檀板隨洞庭波
闕龍吟咽玉山再訪草堂空誰識江南又一鐵況是仙蹤
林壑稀凍雲穿破今歇絕我朝元音簾業設樂章曾補工
尺缺九天不按霓裳聲無人會傍宮牆竊此器何來三弄
稱冰霜迎面頻擊節合趁天風一擲迴瓊花片片飛如雪
從此柯亭製更精米家書畫船中列玉簫金管莫輕吹輪
與清商起巖穴

淮南秋興

天末涼風嘯九秋桂香吹落小山頭淮南有客聞吟樹江
北何人獨倚樓樽酒漫招六從事劍光欲動五諸侯

星名卻

思牛渚虛高會畫舫銀鐙夢舊游

羈戀庭陰午不收最宜高處豁雙眸江濤直下枚乘筆鄉

思初生張翰舟桐葉雨疏人靜夜荻花風起雁來秋何當
博望同移棹倒引星河足底流

玉保字闔峯滿洲旗人乾隆辛丑進士改庶吉士授檢討
官至吏部侍郎有蘿月軒存橐

詩話闔峯爲治亭尙書之弟平生宦迹與治亭同充
侍講侍讀學士同充日講起居注官同侍郎同副都
統同經筵講官同讀卷大臣同彈壓大臣甲寅鄉舉
同爲典試至於扈蹕從獵亦多與兄同時其集亦多
兄弟唱和之作世人比之蘇氏軾
轍然闔峯之詩實不敵治亭遠甚

宿大覺寺

信宿招提境西風坐夜闌不知嵐氣近但覺客衣單徑折
泉爭赴山高月易寒更無塵世想倚枕笑邯鄲

奕枰

一著誰能讓枰中莫苦尋不曾聞落子何處有機心局外

觀常靜談餘數亦深自來疎坐穩狹獮性難任

西山道中

極目西山宿霧屯行行小憩叩柴門蒹葭風冷澄秋水蕎麥花開帶遠村擔榼快聞呼婦子築場幾處散雞豚田家剝棗爭留客丹實離離壓短垣

題覃谿前輩朱碧山銀槎圖卷

酒泉無源天上來酣嬉往往沈雄才欲挽狂瀾導東海仙槎縹緲銀爲杯有元朱氏創酒器張騫軼事形模開雕鏤密栗詳款識攜來滿几雲皚皚當時虞揭恣玩賞竹垞雅詠尤工裁覃谿先生非飲客製圖毫髮何精該我對此圖重歎息匠心獨造驚風雷小器易盈此能受光涵天宇窮八垓敲器易側此不倚平淩海市浮蓬萊向使此槎無識

者沈淪市肆同罇罍販夫俗子任酣暢淋漓顛倒緇塵埃
一自拂拭遭巨眼練光浮蟻澄香醅藝苑圖書共燦爛盡
洗醉眼登天台從來奇物不終晦安能酒食相趨陪佇看
什襲進天府雞彝龍勺輝雲臺

昆明湖

萬頃煙波望欲迷石橋風定亂蟬嘶雲浮金鳳巢阿閣日
照銅牛卧大隄煥館凌霄丹嶂迴水師校戰彩帆齊聖皇
自有平時備鄭重將軍奮鼓聲

宿姚家莊

驅車投荒村夕陽滿林薄田家重款賓殷勤開草閣白云
城中人家世久蕭索徙居牛欄山胼胝事耕作薄田僅數
畝餬口異飄泊迄今三世餘母子保藜藿城中多族黨當

時競炫爍一再過其門嗣續歎日削擔種兩不能此身竟
何託白屋無棟餒朱門有溝壑君看貴家子往往悲中落
聞言心慘悽是非感今昨涼月隔林來西風捲疏籜

王友亮字景南號東田又號葑亭婺源人乾隆辛丑進
士授刑部主事歷官通政司副使有雙佩齋詩集

嚴先生釣臺

不餌帝王鉤東歸狎水鷗早知渠物色一併脫羊裘

雙佩齋

韋以治狷急弦以厲遲迂救偏雖異策命意非殊途我欲
雙佩之客見皆胡盧揖客前致詞剛柔量時需含瓦既驚
鷺模稜仍笑懦老聃語自佳子產論非誣斷事擬鎔錐待
物侔醅醕欲求水火濟詎惜熊魚俱緬維昔賢軌揭之齋

坐隅庶幾能寡過嘗此勸區區

三宿巖

舊傳三宿虞丞相健筆巖端紀歲華落日大江屯虎豹清
風峭壁動龍蛇獨留遺像圍蘋玉無復題名罩碧紗客到
欲爲桑下戀一聲林磬又栖鴉

蔣苕生前輩輓詩

天語呼名士

爲上嘗謂公江右名士

人言勝達官已成千載遇不救

一生寒忽忽蛇年遇悠悠蜨夢闌

公歿于二月二十六日

此中無罣

碍應作去來觀

憶在京華日過從見性情雄談凌貢父逸調陋耆卿

先生善談

諧兼工詞曲有傳奇十八種行于世

勇退緣多病茲遊遂隔生貽詩猶在篋

珍重抵連城

冰山雪海歌爲董蘊田舍人作

冰山自古寓言耳君到伊犁親見來傳是堯年洪水後朔
風搏結成胚胎扶桑十日鑠不動至今屹立萬仞光皚皚
下無寸土上無樹複嶺層巒莫知數直將水體冒山名賴
有回人來鑿路路光如鏡滑如油牽馬不行馬亦愁大聲
忽發山迸裂片石陡絕橫峯頭有時山裂路斷行人到此
防飛墜前導狼踪看幾箇山無鳥獸有狼行者視微生判
作號寒蟲得過且圖今日過徧身起粟兩腳僵六十里同
千里強下山席地甫少憩照眼雪海來蒼茫海無滴水雪
爲水中有橫梁蜿蜒起此梁亦是雪踏成寬可二弓袤十
里相將奮力且勉行凍步不疑搖旌但教人馬小失足
直下雪窟聽無聲吁嗟乎山巔海角人猶駭何況山非眞

山海非海過處曾驚白骨橫望時直使朱顏改方今聖德
大如天幅員遠越千古前奇觀久閱忽盡豁足跡未到嘲
張騫君歸萬里談奇絕一室春風變冰雪天山瀚海詎能
誇聞者心寒耳偏熱徑須命駕醉鄉遊此中險阻艱難俱
不設

翁元圻字載青號鳳西餘姚人乾隆辛丑進士歷官太
常寺少卿有佚老巢遺橐

詩話王伯厚困學紀聞體大思精殘膏賸馥沾慨學
者鳳西集諸家之說以爲之注與嘉定黃氏日知錄
集釋幾於
家有其書

病起將移居蕙曲

冀北歸來又一年輕寒正是養花天尋芳懶試登山屐得
句遲於上水船病減已過春寂寂愁多空負腹便便藥牀

茶竈添新製買得臨江屋數椽

曾煥字庶蕃一字賓谷南豐人乾隆辛丑進士官至貴州巡撫有賞雨茅屋詩

吳穀人曰陰陽開闔歷變化呼噏而後發之王楊甫曰蓬勃如風瀾漫如雲澎湃如泉

詩話賓谷早達陟詞苑值樞密延居華廳清要數十年後官揚州風雅愛士紅橋白塔載酒題襟賓客幾傾時選海內嚮慕比於王貽上盧雅雨一流其詩沈鬱細密無羅綺之氣包安吳最賞其山燒詩層巒從此瘦春草幾時生及望岱詩須知天下雨還望一山雲謂為寄意遙深人所難及

伊孝廉墨卿與余話舊感向者東郡之游而見於詩

黯然奉答

昔游如夢思茫茫語向君前倍感傷樓上酒人明月夜雪中詩話聚星堂雛鴉畏晚尋巢急孤樹驚秋落葉涼莫問少陵舊詩卷不堪東郡弔城荒

眞州準提菴老梅行

白沙江村有老梅百年劫火餘枯荑春風一夜忽鼓動玉
筍旁迸千枝開天地有心試冰雪龍蛇偶蟄驚霆雷今人
爭繞月觀樹往日誰踏僧廊苔廿四橋邊萬花海我無暇
去翻遠來名姿往往寄幽獨相賞故不從塵埃疑是仙人
萼綠降返魂自得眞香催惜無酒酹花前杯參橫月落人
空回

鐵簫吟消寒席上賦

我得南星鐵如意狂歌水仙愁擊碎世間何物堪倚聲竹
管匏笙不能吹鐵崖嘗豢雙鐵龍雌龍入海招其雄千年
干鏤兩俱化至今怒吼吳江風玉鸞也復無消息曾照廣
陵秋月白廣陵鍛工摹影來白鸞毛羽今變黑燕城雪後

風正饕寒冰一條吾手操彈指連珠五星見當頭明月三
天高便欲招呼簫史輩翩然彩鳳同游翺元雲之曲應天
籟世俗絲管空惆嘈如意從今得朋慶以之按拍聲相應
池上粧賓方響飛江東高唱銅琶競此際官梅有芳信吹
徹簫聲花欲迸君不見道人鐵腳誦南華宰相鐵心能賦
花

贈章實齋國博

章公得天秉羸紉迴殊眾豈乏美好人此中或空洞君貌
頗不揚往往遭俗弄王氏鼻獨臚許丞聽何重話仿仲車
畫書如洛下諷又常患頭風無檄堪愈痛況乃面有癍誰
將玉璫礪五官半虛設中宰獨妙用試以手爲口講學求
折衷有如遇然明一語輒奇中古來記載家度置可充棟

歧路互出入亂絲鮮穿綜散然體例紛聚以是非訟孰持
明月光一爲掃積霽賴君雅博辨書出世爭誦筆有雷霆
聲弇訇止市闕續鑑追溫公選文駁蕭統乃知貌取人山
雞誤爲鳳武城非子羽誰與子游共感君惠然來公暇當
過從

酬法梧門祭酒西涯見寄

廬陵久不作茶陵今復見誦君西涯詩憶我蜀岡讌我忝
官茲邦非無流風善政愧賢守前文居眾賓殿徒申梓里
恭聊慰桐鄉戀君家傍西涯才亦西涯擅有如宋公墅寫
入右丞卷翻念塵土人瑤華寄江縣

簡唐陶山乞虎邱寺枯桐斲琴

聞聲有相思進前有不御矧伊淪落久孤植在風露虎邱

一枯桐不識誰手樹幸免爨下焦終稀匠石顧瘁貌肯求
悅苦心良自喻唐侯今宓子鳴琴張治具常歎知音難忍
令此材蠹我有幽蘭曲厥聲靡所附煩君揮郢斤爲君發
淵素

稗存蒙特赦歸寄示塞外詩冊奉答

聖主求言量獨宏謗書宣示舉朝驚竟將忠愛憐蘇軾不
許公卿害賈生絕塞烏頭三月白歸裝駝背一編輕旁觀
猶感君恩厚何況親爲雪窖行

山燒

初訝流星亂俄看掣電明層巒從此瘦春草幾時生久畏
邊烽警何堪野燒驚崑岡無玉石揩眼一傷情

答蓮裳芙初夜坐之作

瑟瑟涼風爲底生
荒荒明月太無情
江樓夜色清如此
一片吟蛩落葉聲

清明插柳詞

新煙曉颺江城煖
樓閣朦朧覺春滿
隋隄柳枝昨初翦
插向門闌露猶泣
生憎柳態嬌於人
門裏門前眉對展
黃鸝上下紫燕翻
往往誤觸蒼琅根
打球開讌笑溫黃
金端合爲君門纖
腰舞倦春亦去走
馬風中已飛絮

贈劍峯

茲別昔嘗有此才
今所無寸心千古
遠半世一樓孤

君著心樓集

江大愁難沃風春
病不蘇誰爲張謂
者觴爾漢陽湖

觀音寺僧道源獻蠟梅一枝酬以數句

芳杜洲前新月黃
月中一院旃檀香
道人嚼花同嚼蠟
滿

嘸冰雪清肝腸卻拗一枝持贈我知我未減青蓮狂鷺兒
臘釀正新熟清氣浥浥添杯觴昨訪曹溪過梅嶺南宗寥
落南枝荒道人能參黃面老當爲五祖開道場

答蘭雪

西山自昔兩詩人苦學神仙施與陳龜息尙留丹竈地鶴
飛何處白雲身君吟松月能耽隱我重柑橙願結鄰談到
交游多鬼錄南皮爭不念前塵

爲巢松序詩竟附寄一律

二十年前小鳳凰會從席上歎冬郎海南猶照爇天焰河
內今瞻治水航知有門生來載酒惜無老輩共登場聞君
兩鬢新霑雪莫嘔心肝向錦囊

汪學金字敬箴號杏江晚號靜厓鎮洋人乾隆辛丑一

甲三名進士授編修厯官左庶子有靜崖詩藁

詩話乾隆戊辰持齋太史以第三及第後二十三年而杏江繼之世家踐陟清華名第相同一時稱盛事既乞歸營靜厓小築有池館水竹之勝安禪習靜翛然出塵詩亦超妙絕俗

建陽道中早發

雞唱登前坂霜花襯馬蹏人迷三里霧路轉百重溪水碓高於屋山田疊似梯一村楓柏樹爭壓帽簷低

過嚴陵釣臺作

丹楓爲幃石爲屏百尺高臺照客星兩岸猿聲落秋水至今山色爲誰青

泊丹芋墩

小艇緣溪行繫纜垂楊塢綠野炊煙微人家在春雨

胥江夜泊登萬年橋望月

胥口驛前風路饒鐘聲漁火最魂銷月明子夜誰家笛人
上吳江第幾橋舊雨漸成萍跡散春風應惜馬蹏遙緣知
一別愁如許翦燭篷窗話晚潮

元夕

客裏逢元夕篷窗聽急流我行纔七日有夢在孤舟鐙火
明官驛人煙冷戍樓今年江上月一度已當頭

舟夜

月落江煙昏孤舟趁潮去忽聞雞犬聲知有人家住

過趙北口

趙北燕南地蒼茫旅客過西風吹易水落日下滹沱大澤
龍蛇動荒原雁鷺多市中屠狗散無復有悲歌

望廬山

廬嶽仙靈宅摩空勢絕羣峯留太古雪樹出四時雲虎跡
寒溪見猿聲落日聞欲求真面目騎鶴問匡君

積霖歎

積雨快田壤官路水深泥滑馬不渡溼衣及膚燎不得主
人號咷僮僕訴行人爭諉居者安誰知居者尤艱難一年
耔本逐流水赤腳老農瞠目看來朝乾鵲噪簷樹行人歡
喜搖鞭去暮宿前村府帖來淮南又報蝻如雨

夜起

羈人起夜半殘月在四野天風吹孤雲明星欲西下遠道
苦阻艱太息視羸馬獨立黯自傷誰念遠游者

河間道中早行

偏衫席帽慣長征清露涼颼趁曉行鄉夢遠隨殘月影客

愁併起亂雞聲游梁詞賦慚司馬入洛年華感士衡最是
旅程秋信早哀蛩又傍馬頭生

東阿舊城

雉堞參差望裏分郊原禾黍綠紛紜斷厓泉放千盤雨夾
嶂人穿九折雲廢閣蒼苔曹植廟殘碑青草項王墳英雄
消歇才華盡匹馬荒城送夕曛

過臨情訪謝茂秦故居不得

客舟晚繫衛河濱卻憶論詩謝茂秦異代風煙青海宅中
原壇坫白衣人關河墓遠魂難返車笠盟寒事莫論回首
三弇文藻地風流一樣絕音塵

蓮士見示扈從盤山用陸放翁韻詩卽次原韻奉簡
春風放顛花事殘綠陰滿庭春晝閒午時睡醒鬢絲亂閉

門枯坐如深山故人扈從薊門返呼童掃徑開柴關三日
不見生鄙客覲面惟恐遭譏訕袖中一卷瑩冰雪怡然四
座開心顏青山落日響鐘磬一鳥嚙嚙嚙花間萬松入雲
亂蒼翠千澗咽石歎淙潺樊籠塌翅不飛去境地毋乃分
仙頑夜來有夢到盤谷朝眞許綴蓬萊班洞門徧地種瑤
草仙人放鹿何時還

盧師山祕魔匡

山溝石破碎步步苦跛蹙引手落鸛巢斗削太古鐵寒潭
瑩深碧中有蜿蜒穴昔聞二龍子親受尊師訣當空一指
禪剎那悟生滅龍來澗自清龍去井不竭側耳疑風霆沃
盥未敢褻瘦影落危匡叢蘆捲秋雪

朱蘭馨字芬若號松喬海鹽人乾隆辛丑進士授鉛山

知縣歷官吏部員外郎有松喬詩鈔

詩話松喬初宰鉛山地當衝要民情健訟手批口斷羣情悅服旋以湖口同知內擢司勳詩不多作有登橫山詩云地是逋翁宅詩登李杜壇一言春草句聲價滿長安頗能以高格取勝

江行雜詠

江行盡日趁和風
估客帆懸十幅同
最是客心看不足
亂山蒼翠夕陽中

登秦駐山

秦皇飛劍挾浮雲
望海東來駐六軍
蓬島未回童女楫
桑田已起美人墳
山有始皇葬美人墓
祇今報賽隆千載
當日巡遊徧八垠
極目遙天秋色老
波濤滾滾夕陽曛

徐昆字后山臨汾人乾隆辛丑進士歷官禮部員外郎

有柳厓詩鈔

登王屋頂

王屋高出碧落天芒鞋今已闕其巔日精月華環左右析
城砥柱相鉤連西華中嵩互揖讓崑崙河勢流如峇俯視
城郭小於豆中州千里看人煙我聞潛通仇池穴無乃洞
口煩窮研結茅索向清虛住住久定可逢眞仙醉後碁敲
煙樹裏醒來花落枕函邊跣趺子午工圓足木鑽工滿嬰
兒堅丁女王公固結久乃可出游任飛躡不然結竈養丹
砂玉樹黃芽轉轉鮮金鼎已鑄丹已結何愁日月頻流遷
同心之友皆曰可思歸從者有拘牽一念稍移墜塵劫木
公金母不吾賢揮之仍復落世網學仙還待五百年

卽目

碧澗銀流水石春懸崖倒掛兩三松半巖應有人家住一

縷炊煙上遠峯

張經田字壺山湘潭人乾隆辛丑進士歷官貴州貴東
兵備道有壺山吟草

歲暮感懷

兩地西風淚全家東海居支離患難後骨肉死生餘郵滯
音書斷途窮生計疏憑誰供俯仰歲晚更何如

移居新街旅店

來就新街店門庭我到曾移居忙似燕危坐淡如僧賓館
一無事吾儕百不能將何消晝永吟與醉相仍

劉錫五字受茲又字澄齋介休人乾隆辛丑進士改庶
吉士授編修歷官武昌知府有隨侯書屋詩集

黃土坡遇雨

坡陀纔數尺車馬日如流永夜淋鈴雨終朝薄笨愁輪旋
如宋鷁人喘肖吳牛誰信慘躑水風來解覆舟

卷施閣燕集

我懶不結客願從詩人游烹字恆苦餓對酒能忘憂卷施

主人大招手恰有蘇家酒一斗燕市酒徒多故人入座無

煩問誰某學士乍輟螭頭班法時青衫司馬官正閒王少

畫鬼山人閣畫筆羅雨吟愁平子停吟牋張水西曹水部

都散直大復恰並崆峒肩李石農楓欲丹時菊欲黃一風

一雨天深涼當關不怕醉尉醉罵座或恕狂奴狂樂莫樂

兮文字知惜莫惜兮少壯時一年好景君須記百罰深杯

我不辭君不見韝上鷹早時呼雨春風聲又不見梁間燕

江南塞北年年見萬物變化有如此英雄豎子皆前死阮

公慟哭徒爲爾樂哉糟邱吾老矣

袁簡齋先生生輓詩

作宰桐鄉便作家甘棠陰裏種桑麻山中安石留棋墅屏
後扶風列絳紗死悟前因仍是月生無一日不看花口碑
儘有遺民戴豈止天台老衲誇

陳廷慶字兆同奉賢人乾隆辛丑進士改庶吉士授編
修歷官辰州知府有古華詩鈔

青石梁道中

兩崖青石引青莎一徑松杉冒薜蘿立馬愛當奇石秀下
山猶見夕陽多願同孺子塵纓濁可有高人邁軸歌嵐翠
泉聲行不斷道傍時欲坐盤陀

由嶽麓寺下山返舟作

湘濱來五度纔得一登臨片片江帆影重重嶽樹陰碑賒
三日讀僧向六朝尋欲續傳鐙事斜陽下碧岑

戚學標字翰芳號鶴泉浙江太平人乾隆辛丑進士官
涉縣知縣有景文堂詩集

詩話鶴泉幼有異稟從齊次風游高宗巡江浙獻
南巡頌幸涉縣減閭布征額攝林縣有兄弟爭產者
集太白句爲斗粟議以諷皆感悔以作上官罷後改
甯波教授尋辭歸壹意著書精於攷訂詩宗老杜

新河戚武毅公祠

譚守先聞武略垂將軍決策較神奇頓教案堵民如故不
使沈舟賊得知極浦鴛鴦迷古陣高城燕雀集空祠角巾
徒步吳門日愁絕燒荒部曲詩

東村感事

大府夜下帖吏人晨到鄉紛紛帶鋸鑿閭里咸驚惶不知

吏何急聲云官取樟東村老翁家禍將及蕭牆置酒款吏
語但求吏致詳往時溪壑間林木頗鬱蒼不少百年物最
下千尺強老幹飽霜雪夕陰生夏涼其上巢鸛鶴其下蔭
牛羊比年官盡取一一殘斧斨慘澹風雲變彌望沙土荒
此木得不伐因緣屋側藏非敢與吏抗崩壓愁棟梁吏去
無空手餽乏金錯囊然眉急暫緩剜肉心用傷方今世清
晏萬里波不揚幢幃備巡哨歲修自有常何以竭山谷購
求動干章嚴令禁盜斫寸板勞周防邱山萬牛力日令田
功妨官得亦有限吏兇不可當不見東海頭風雨卧舢艎

七夕

織女不在東牽牛不在西何故杜陵老詩乃顛倒之

杜詩牽牛

在河西織女處其東

東西既易位心志安得齊由來陽德剛轉爲陰

所欺年年七夕會一渡河之塵既會輒又返何如不渡爲
豈惟人事迂天上有乖離不見奔月人忘爲后羿妻帝孫
本驕貴益視田夫卑天錢縱可貸勸君勤耕犁

祛惑

文章出真性忠孝爲之原置此而不講藻悅徒紛繁臨汝
有才子二十聲騰騫少年志易滿不惜逾短垣一旦鳳池
奪仍有當路援出入芙蓉府謝去州縣煩非吏亦非隱車
馬填其門園亭恣游宴姬侍供盤飧晚益自任誕夥頤爲
大言名教有樂地渠欲一力翻人品不足齒詩文亦何論
況觀所論著無一究根源腦脂遮俗眼盡如古井智風一
而勸百不覺入其樊欲舉其人書拉雜盡燒燔一掃輕薄
習得見古道敦淫邪義當闢楊墨非有冤

讀韓昌黎詩

平生強性韓退之餘事復見於作詩文起八代甚正則特
於詩也逞瑰琦硬語險語兼苦語雜以奇字斑陸離明若
訇較激雷電幽如睽閃藏鬼屍真宰上欲九閭訴回頭下
與兒童嬉虞舜夏鼎嫌典重往往破碎前人辭有時任意
自作故究窮所出奚從知本集如峙質能化質逞志縱獫
獨用經不免破碎脂沙滂葩賦賦敲臚等字皆不見所出神龍變化弄牙角天馬奔放無羈羈吾服先
生膽之壯吾驚先生氣之奇設無此氣與此膽殿上逆鱗
誰敢批因悟先生詩如此亦是狡獪有意爲朝廷紀綱壞
奄鎮風俗崇信趨黃緇翕翕訛訛妒賢士此輩奚止叔文
伾皇甫張李數子外當日可與莊語誰賈生痛哭旣不可
東方侗諫吾其師病鴟妖鳥紛寄託要亦原本風騷遺洞

精矐眊莫能識舉世誰得相瑕疵先生之詩豈易讀在得其髓去毛皮滿紙風雨雜陰晦中仍白日青天垂李杜壁壘未許拔卓然自樹韓家旗文章一道有正變絜長度大甯非癡

走馬岡

高天凝望秋煙紫瀆山一帶平如砥憶昔洋山五雄豪爭騁華駟馳綠耳旌旗掩映林木黃螭騰蚪踊迅莫當深雍蠻靴短後服俯身捷下萬仞岡陡挽青絲更一上疾於鷲鳥摩穹蒼有時據鞍示從容顧盼自信人中龍賓從賦詩石鏡塢日宴高會烹駝峯君不見項王築臺彭城中子陽躍馬亦稱雄紫色蛙聲運一變徒令顧影嘶酸風雨聞樓船下楊僕立見土地收寶融英雄割據竟何有蒼莽溪山

重回首海舶如雲不可恃慶元三郡爲誰守玉山原頭吹
暮笳子弟猶聞賜五花卻勝齊雲樓上火夜夜風雨鳴鬼
車

台州八忠祠歌

忠義不易得得之況一鄉偉哉革除年

遜國志成祖革除建文年號仍稱洪

武八公先後慨以慷梓里千載生輝光王修撰廣德亡撰修

名淑英今太平人奉命募師廣德自經於祠山道院鄭行人東平名華臨海人謫

能兵下力疾蕭縣不受脅力戰殉封疆鄭恕仙居人知蕭縣禦敵爲王聰所

破被京師既陷徐盧執同日又殺兩侍郎徐屋字宗實黃巖人官兵部侍

郎盧迴字士恭仙居人但見周公不見成王擲筆痛哭大

呼高皇秦法未聞誅十族得禍之慘無如緱城方史王諭

日吾法周公輔成王耳孝孺曰成王安在又令草詔大駢批數字擲筆於地王曰汝不顧九族乎曰便十族奈何駢

首八百七十人

史載連誅之數

焉能活我賢太常

盧太常原質及弟三人正學姑

子葉公指斥亦遭戮至今史筆猶煌煌

葉惠仲臨海人充史官修太祖實錄

永樂元年以指斥論死

舊聞祠中列林鄭

林嘉猷鄭公智皆甯海人坐出正學門死號爲

十烈同享嘗不知何時去徐葉母乃討論未之詳我讀遜

國忠臣記內有刑部司務郎自號塞翁亦台士夔慶萬里

從奔藏

司務馮灌黃巖人從建文出亡或稱馬二子或稱馬公

石樓顧老變名姓扣

角高歌飯牛行

顧碩仙居人宰石樓棄官爲傭嘗作飯牛行行路行古無二讀

春坊遭

剿事非實要亦節概殊尋常

林春坊公輔先死彭夢祖碑陳龍山傳皆載永樂時召至

京不屈遭剿又見史概

八忠十烈未足盡俎豆增祀宜一堂吁嗟乎

金川門啟迎燕王景隆之罪萬死奚足償

燕師得入京城由景隆非將才

開門迎降

洪武養士三十載可無義士扶倫綱君不見赤城郡

中忠烈氣蒸作彤雲萬丈芒

題石屏詩鈔

南宋百年變風雅詩格江湖日趨下大中元和儘僞體神
頭鬼面非作者湖海人豪推石屏晚出意氣吞九冥渭南
西山競把臂眼中甯復知四靈新篇往往妙天趣山外青
山渡旁渡烏鹽白紵彌清新樂府海內爭傳播平生不屑
李蔡侯快意日作龍門游朝從甌閩厯吳會暮出玉山夢
羅浮聲名所至盡倒屣門有孟公一座起酒酣落筆公卿
間有如三峽驚湍駛白頭闊扁年復年青袍單舸還平泉
當時不少酬碑絹歸來仍缺買山錢海埂一路迴殘照相
林落葉過憑弔北柵記刻江湖詩南塘滕祀相公廟名高
自古受玷傷新練舊素誰致詳南村升菴好勦說庶幾識
者爲表章

楊倫字西禾陽湖人乾隆辛丑進士官荔浦知縣有九

柏山房詩

詩話西禾論詩取法乎上徑睇少陵嘗撰杜詩鏡詮
網羅眾說多所發揮時隨圖方主東南壇坫其言詩
最不喜分唐宋西禾賦詩幾之以爲習偏護短而北
江品西禾詩又謂臨摹畫幅稍覺失真或持論高而
自作未能副歟

蘆墅放舟同映川兄弟蕙疇穉存尙之淵如應尾

爲訪招提去輕橈指曲塍秋風千頃稻夜雨半湖菱潦草
杯杔具喧呼澗谷應迴舟防月黑林際閃疎鐙

題王二秋塍詩藁卽送北上

故鄉吟伴集羊何磊落王郎斫地歌同輩欲歸君更出滿
天風雪渡黃河

羚羊峽

江流日奔騰聲過如萬弩偃仄驚入峽程途此艱阻林篁
交蔽黑不復辨子午高崖坐羣猿垂臂引客語稍出向靈
山微陽翳初吐人家嵌石壁如蠅未可數沿塘種木綿插
棘防猛虎月起聽蠻歌誰知我心苦

錢塘字禹美號學淵又號慨亭嘉定人乾隆辛丑進士

官江甯教授有鶴原詩草

詩話慨亭偕弟十蘭並承家學訓詁考訂卓然可傳
十蘭緣書爲有情一大家慨亭則早歲工詩列練川
十二子中其吐屬名雋亦不減潛壑堂風格

定林寺夜起

夢覺聞寒鐘起行向巖谷草徑露氣深流螢點修竹宿鳥
棲忽驚山泉斷還續余心憎無事徙倚至明旭

九日同嚴冬友諸景雲王少陵汪綉青楊上玉畢文

欄金宋瑞登拾城山

時序易摧謝江山感物華百年幾令節名士半離家地迴
日沈樹天寒雁落沙空憐一罇酒寂寞伴黃花

寄諸佃楞

虎尾羊腸事可驚頻年憂患苦相嬰絕交豈敢如朱穆入
世誰當恕禰衡慷慨帶刀豪士氣蒼涼擊筑酒人情過都
一蹶非無爲習坎由來未易行

沈在廷字楓墀高郵人乾隆癸卯舉人官內閣中書有
經餘書屋詩鈔

許州

魏武英靈一代雄許昌城堞霸圖空生前吳蜀心思并死
後師昭恨不窮繞郭殘荷餘冷豔參天衰柳咽涼風魂歸

若向襄樊路猶憐燒時赤壁紅

由壽陽至南天門放歌

壽陽出發月光滅夾道犂确馬蹏熱四十里至平定州蒙
蒙元氣山頭結頗嫌陰晦封晨輝忽見霏微數點雪石子
五色錦綴紗枯樹千株眼生纈大壑急流奔弩箭橫峯側
嶺卧精鐵向午曠日煥生春望中傑閣駕寥泝杖策徒步
石路危牽衣屏息人力竭繞膝兒孫讓幾層垂地星河驚
一瞥巨靈掌擘八荒低雷公震鼓四維裂我聞卯次爲春
門字義流傳祖倉頡又聞閭闔開天門浩蕩陽和萬民悅
此門直令天人通羣仙朝會進由闌峭面空自駭文陵會
稽那及稱禹穴更陋江南矗兩峯孤帆一片波濤折城隅
稅鞅欣來游應圖霍山兩奇絕

夜宴曲

朱門田第連雲開主人豪侈何雄哉金釵十二擁燕趙珠
履三千誇鄒枚日長不足繼以夜肴由鼎進酒傾壘華燈
四照張火繖管絃迭奏鳴春雷方其得意逞雄肆黃金揮
灑飛塵埃一食直兼十戶富一衣直費十錦材酒闌人散
客歸去更嚴霜重月墮霧乞兒覓食那可得路側城隅空
歎息

題印譜後

尉律試八體摹印義乃見甄豐標繆篆實同名偶變大雅
推漢京精金百鍛鍊參之以貞珉溫潤足嘉羨信國鐵倍
珍忠介泥獨炫迭爭千載奇文房供清讌黃子汲古探史
學熟貫穿哀集成一書朱墨分素絢體旣用編年例復類

紀傳開卷燦列眉厯厯三長擅我憶櫟園叟印人索殆徧
詎若溯周秦邃古如覲面窺子雕鏤心面壁坐深院重子
奧祕才交游廣淮甸笑彼刻楮葉三年成一片西清古鑑
中貯此值千絹

星球圖歌用昌黎石鼓歌韻

分野乃究括地志測象乃讀步天歌按歌制器宗內府縮
以六十精若何度想穿月掛秦鏡芒近落日揮魯戈陰陽
爲鑑鼓造化桌氏煎錫工揩磨黃赤低昂判冬夏元精耿
耿心胸羅入地出地去一握九萬餘里堆嵯峨天圓地圓
本曾氏仁智信武融四阿卓哉靈恩合渾蓋磨旋笠冒誰
其呵木周十二火再歲首事東作兼南訛金水一更土廿
八填星不動芒斂蚪五緯熊熊定方嶽遐矚那俟更應鼉

魁秦樞楚識斗柄四照之花三秀柯角亢翼軫守方位烏
兔踰踰如飛梭天漢案戶極縣互波瀾情淺長委蛇二千
五百乃星紀雍南朔東通夷娥伊余卧疴逾十載衡茅伏
處江之沱忽睹異製豁心目揚蕤振采嬉天和聖朝右文
重實學熟嫻算數尊儒科激水祇用挈壺法刻木輒慮機
械多何如一軸十四器重匪石鼓資橐駝精微欲穿溟滓
入汗漫敢委雲煙過弧矢句股稔成法刻楮累丸切復磋
土圭立不測陰景方諸水斲生金波惟茲圓則燦珠琲力
張樞紐平無頗晝晴夜雨靜可按捫參厯井焉知他文字
更學考工記樸邀微至屏炯炯雲臺司掌憶法物斗室陳
設供摩挲春秋幸免螭蛄誚宵分可助詩書哦效顰無術
晒刻鵠臨池覓句慚籠鷲崇耿詢直突過孟言坐致理

則那中西兩法盡融貫虛車待治成錄軻克輔妙手削兼
尺慎勿遠怖漢與河出卯入酉諦審視衰年愛景無蹉跎
睡起

空齋足繭坐生塵引睡求書夢未真枉向蕉中尋覆鹿誰
知爨下是勞薪日馳西陸嗟張協病怯東風念李紳迴憶
草生官舍靜卧游聊與畫圖親

讀宋史感鄒志完事

嶺海何須出涕行勝於寒疾困心旌儒生不少當爲事抵
掌如聞歎息聲

諫草雖焚未可輕一緘妄出禍機生新州赦後昭州竄二
客同時有令名

吳昇字瀛日號壺山一號秋漁錢塘人乾隆癸卯舉人

四川候補知府有小羅浮山館詩鈔

丁松生曰秋漁前後述哀詩二十首宛轉悽惻讀之不歡集中與弟秋農詩甚多令人增友于之懷詩話秋漁以大挑縣令入蜀從勒文襄戎幕參畫軍謀積功擢知府歷權諸郡多惠政蜀人感戴之灌口繩橋見范石湖吳船錄及東坡詩知灌縣時覓故處不可得夏秋怒漲從白沙渡者輒患覆溺乃召父老諮地利重建繩橋以鐵索及竿爲之凡長百二十丈行旅稱便自紀以詩其在川邊諸作雄特峭拔爲時誦傳

新兵行

行糧全坐糧半給米論石錢論貫東鄰健兒力如虎西家壯男能伏弩投名入籍報官府領軍馬上持檄來轅門逢逢朝打鼓今日下教場明日催束裝盔兜有纓甲有裳箭羽白雪刀白霜飲徒博徒舊相識送爾黑水之河旁此去殺賊先擒王

鄉兵行

焚爾穀燬爾屋殺人如麻不敢哭忍淚含飢草間伏爾勿
伏賊人索爾剝爾目爾勿走賊人追爾別爾足爾有丁男
爾禦侮十人可什五人伍沿山樹柵路置弩守則鳴鉦戰
則鼓官兵十萬動地來犄之角之惟汝才入賊陣取賊將
首馳歸報捷旗門開大府論功上封事駐馬田間問名字
千夫百夫爾長之昨日村農今武吏長揖縣官投一刺

土兵行

徙都耶笮都耶曲烏烏之夷奴耶五十五州亦土亦流罰
不應役牛五十頭頭人舍人不識字蠻語啁啾問通事花
裙小隊跳躍來酒市關門婦女避鼓聲三通角三疊今日
將軍親簡閱殺馬椎牛大饗卒蠻刀割噉口帶血挾爾哈

靶礪爾及密

蠻語呼箭爲哈
靶刀爲及密

滅賊歸巢未六月

土兵性畏暑

老兵行

公徒三萬來駿駿壯夫力士紛如雲國中七尺野六尺安

有羸老堪從軍老兵老兵爾何苦曷田爾田宅爾土豈無

若子若弟堪荷戈白頭猶復稱官府

川俗呼兵爲官府

老兵聞言

笑不止不失聲哭反狂喜自言弱冠充餘丁得補名糧周

一紀轉戰從征三十年半生眠食槍煙裏迢迢衛藏指西

招雪山埋人鋤不起大雕側翅來啄眼飛馬奔回二萬里

將軍厚我老猶健能挽強弓能啖飯解衣徧眎無寸瘢矢

石不侵眞鐵漢前年平廓番三載征苗疆夔夔戰鼓響三

峽半夜下令催軍糧帥旗勿勿渡江水行營直到家門旁

家門咫尺歸不得縱使歸來人不識昔年火伴盡高官化

作煙雲纔瞬息不如老兵長不死百戰身經等閒耳醉卧
沙場亦足豪閒將一劍磨秋水

灌口觀漁

西來之水如建瓴漁者陸處煙中汀竹村汎汎代舴艋蹋
浪穩如平地行不營萬匠筴不結百囊罟漁竿籊籊荷烏
鬼長喙碧睛水中虎冬晴灘落漁唯唯吉日維何王與癸
爲鷺爲鸛儼成行水面合圍森壁壘一聲叱咤風怒號翻
身陡落隨奔濤烏衣隊隊霎時沒但聞水底逃鱗撥刺而
驚跳須臾鼓翼衝波起銜出銀鱗半窺尾大魚跋扈不受
擒拍拍飛來爭角犄魚籠已滿鸕鶿歸驅之不下亦不飛
漁翁愛魚亦惜鳥大魚入市小魚療爾飢吁嗟此鳥能知
止得少不憂多不喜飽食居然無忤容閒閒曬翅斜陽裏

夜泊石潭

秋水生前夕高灘湧大谿驚風吹浪急斜月向人低夜客
沙中語荒雞樹杪嘯柁樓眠未穩欲夢已淒迷

宣府

宣府城高壓暮鴉雲州西望控龜沙秋光雨淡關門柳曉
帳風傳塞上笳邨堡負山皆鐵盞健兒飛弩勝銅牙不須
更設烏桓府中外於今是一家

幽燕重鎮奠雄圖隍堦重重擁大都洋水東流趨涿鹿寶
峯南峙扼飛狐弧旌在羈星常捲帟幕來巢鳥自呼無限
碧雲西海闊李陵臺畔月輪孤

夜刁無警野煙和漠北塵氛頌止戈箭嶺晴雲橫素練玉
關寒雨簇青螺時平不用防秋急巖冷眞宜結夏過耕柞

安毗烽燧息隔垣閒聽牧人歌

李苞字元方狄道人乾隆癸卯舉人歷官山東鹽運司

運同有敏齋詩草巴塘詩草

吳松厓曰元方少年能詩及官粵西山川悉入謳吟領異標新脫棄凡近

詩話隴西詩人傳作稀如星鳳元方自序謂其鄉人

以詩鳴者張康侯晉牧齋謙兄弟及吳松厓鎮爲最

著松厓卽其所親炙也元方詩雅有唐音巴塘集得

江山之助爲菁英所萃餘亦多秀句五律如感懷云

山月自今古江流忽淺深深谷桃花云不見劉兼阮

焉知漢與秦無言亦無憾翻勝息夫人山堂云雨晴

梁燕去果熟野禽來香國寺僧送桂花云自願身將

隱相隣影亦秋七絕題桃源圖云要知耕鑿昇平日

處處桃花源裏人皆情婉可誦

發化林坪住瀘定橋

林深反無鳥山曉猶煙霧欲早起卻遲竟爲幽谷誤遵隈
徑詰曲傍崖心恐怖澗水分順逆我行異沿沂山木罨官

印山集卷一 下
橋春波漲晚渡故交會面難客館且小住

宿頭道水客館

重掩象肺腑幽深寓耳目峯疑日月避山將天地東飛瀑
頻溼衣懸厓欲壓屋對面嶺雲白隨意階草綠跋涉已半
月淹留忽三宿晝夜風雷響春睡不敢足

早行過折多山

太白引行人行向天西畔山腰青一片鞍馬衝煙斷厯坂
遡九折攬轡增三歎大荒飛鳥外茲嶺復天半毫無雲木
秀徒然雪漫漫沙礫所積成嶠嶠空淩亂嶺西夏猶冬重
裘御青猊野飯猶難得勞薪命炊爨

宿卧龍石

蠻民不鑿井結廬傍水滸過客停征驂亦作東道主初夏

日晷長到來已亭午轟轟雷數聲雲腳拖衡宇對面千仞
山上雪而下雨溪草抽碧綫嶺樹翻白羽景色分濃淡高
低異寒暑他日逢雲林煩將畫圖補

再宿中渡

松光照四壁山昏未及酉客悶無可遣吟餘茶代酒野店
寂無人散步道左右峽中天不大尙得見北斗萬籟都不
聞祇聞寒溪吼長途借馬騎明日能行否

自麻蓋中過雪山至西俄洛

昨日穿雲林今朝過雪山咫尺風土異蒼茫宇宙寬火龍
不到處夏日亦生寒凍泉依石瀉清冰作鏡看松杉畏生
嶺避風藏山灣遂令重疊嶂頭禿空嶺岈饑馬恨草短僕
夫苦衣單悲歌猛虎行惆悵行路難

謁少陵祠

郭外草堂寺旁留工部祠老曾憐鬢髮愁尙現鬚眉幕府
秋風客江村春日詩溪花相信久吏隱實兼之

翠竹斜籠徑幽花淺映池交游鷗鳥在心事子規知稷契
生平志乾坤絕妙辭典型垂往哲捨此欲何師

許乃來字遜懷號菊船仁和人乾隆癸卯舉人歷官太

倉知州

詩話菊船始官粵東香山其地山海交錯爲桂村
藪菊船嚴於治盜而不事株累大府聞有沙尾紫者
爲盜巢縣別有沙尾村誤謂卽其地發舟師往剿菊
船力白非其地乃得免移宰臨桂香山民傾城送之
官粵西遷牧賓州亦有
惠政兩地皆祀名宦

雨雪書懷

山向湖東萬笏開翠峯寺接雨花臺參禪欲作逃禪客濟

世誰爲不世材偉壯風聲催雪去迷離樹色趁雲回莫將
冷淡嗤生活聊假蠻箋自遣懷

劉東里字也僑慶雲人乾隆癸卯舉人官費縣知縣

嶠函懷古

兩峯高矗鬱蒼蒼舊說山河百二強天轉星辰迎夏后山
排風雨扈周王神皋東據西都賦鬼哭今留古戰場欲弔
興亡千載事淡煙衰草又斜陽

蒙陰道中

歲晚蒙陰道崎嶇翠靄間野泉流廢路黃葉染秋山村酒
留人醉清風送客還寒雲遙望處疑是穆陵關

李符清字仲節一字載園合浦人乾隆癸卯舉人官東
鹿知縣有海門詩鈔

海幢寺

城市忽已隔林泉遂見招盈盈涉珠江望眼增迢遙小艇
呼蜚人駕以木蘭橈僧雛解好事爲我茶瓜要入門優曇
香花雨氤氲飄長林蔽修景天籟鳴刁調塔鈴語云何如
聽風過簫比邱三五輩宴坐圍松寮一聞梵唄宣餘聲靜
不囂俄頃鏗華鐘汨起滄江潮馮夷跋浪舞靈怪爭來朝
神魚似銜珠蛟人或獻綃所過皆殊境頓覺心神超始知
青蓮宇變幻非意料栖栖塵土中無乃同鷓鴣

登冠頭嶺礮臺觀海

我官北海家南海居海今初上海門大壑有時跳日月洪
波終古盪乾坤礮筒天半蛟龍舞網集沙灘鳥雀喧安得
仙槎浮我去直窮牛斗問仙源

彭城夜雨寄家兄菽園

河干一夜聽蕭瑟
春雨淒同秋雨聲
惆悵對牀人
萬里果然漂泊在彭城

九日峽山寺登高

十年夢隔飛來寺
九日舟臨凝碧灣
叢菊三秋開竹徑
飛泉百道響松關
空潭犀去沈金鎖
古洞猿歸解玉環
佳節幾能逢勝地
峽山今日擬龍山

七夕立秋大雨

涼颼騎月洗炎氛
併作迎秋乞巧文
天上雙星塵世雨
陰晴祇隔一層雲

翁咸封字紫書常熟人
乾隆癸卯舉人
官海州學正
有潛虛詩鈔

聞鶴鳴

涼露滴清響。翛然孤鶴驚松間。夢初斷。花下舞還輕。野迴
籟聲絕。天高秋氣橫。此時應獨立。一吐望雲情。

過金山

江面一峯秀。江聲繞寺寒。樓臺空際現。雲樹鏡中看。贈帶
風流在。分泉意興闌。蓬萊原可到。惆悵避迴湍。

海棠吟

錦城纈林擅春色。名花一枝香一國。照眼紅妝絕代姿。笑
風泣雨情無極。天然豔冶去雕飾。勻粉施朱淨如拭。銀燭
高燒金屋深。護持憑仗東君力。滿院春陰作寒食。游絲穿
柳。當風織紫燕銜飛上。畫梁紛紛蝶散雕闌北。惜春底事
爭相憶。冉冉春光惜不得。香霏閣上捲簾看。杜宇啼殘暮

雲黑

豐臺芍藥謠

揚州夢斷狂飈起，綽約花魂度江水。異香片片團作雲，飛
墮豐臺幻紅紫。豐臺芍藥顏色殊，萬花作會鋪錦毼。就中
一枝最妖豔，玉盤捧出傾城姝。王孫賞春蕩春日，量珠買
春歡不足。曉來金彈打黃鶯，蝴蝶卻依花底宿。可憐三月
羣芳殘，獨攜豔友凭雕闌。隔幕風搖綵旛冷，酒澆婪尾留
春難。粉醉紅酣日將暮，葉上愁題別離句。一聲鶗鴂怨春
歸，絮亂絲繁夜迷路。

瓶花歎

灼灼瓶中花，可憐顏色好。色好已離根，芳菲亦難保。

李簡字廉村號有山武邑人乾隆癸卯舉人官廣平訓

導

詩話藤村搜輯歷朝織輔詩卷帙繁重陶鳧薌編次織輔詩傳頗取資焉

秋夜

六合湛明月高齋月影中池潭成積水人似在遙空清響風敲竹秋痕露浣桐悠然雲漢表應許夢魂通

楊興植字世滋號蓀甫新化人乾隆癸卯舉人

望華嶽

崎嶇越雄關振策及清曉遙天翠巘橫巘岼入雲表停車問居人指點巉崖巧四方類削瓜三峯如卓犖明星插漢高玉女綴日小巍巍白帝宮齟齬蒼龍道磊砢不盡洩突兀殊未了元氣所鬱盤金精盛環繞平生好奇偉山水足登眺何期燕臺客復遣吟西顥將尋衛叔卿或覓希夷老

深參出世心庶緩愁腸擾

宜溝驛紀事

漳水之南宜溝驛野潦縱橫古道失太行風雨從西來勢
如萬馬衝韁逸我車縱轡越平岡斗逢山漲來汪洋僕夫
不幸入坎窞馬蹶車翻水入箱電光礮礮雹珠落人影何
殊雨淋鶴後車冒雨至倉皇始附前軒覓棲泊行囊檢點
雜泥塗且趁烈日鋪階除破帽敝裘俱被毀殘書禿管亦
遭汚吁嗟乎紫綬金章不可得玉軸牙籤購無力區區篋
笥豈逾分忍使書生削行色人生憂患來無端得馬亡羊
事渺漫當前有酒須痛飲幸勿悲歌行路難

野望

寒綠遠霏霏春城花事稀雪消江水闊日出嶠煙微小舫

臨巖渡雛禽趁母飛荒郊游屐少人面已全非

朱霈原名榮朝字熙佐一字約齋黟縣人乾隆癸卯舉

人有望嶽樓詩

劉海峯曰古詩蒼蒼莽莽有磊落不羣之概錢竹汀曰約齋孝廉研精經學著書滿家而詩格豪放兼有昌黎眉山之長近體清婉似王文簡可見胸中無所不有也王鐵夫曰卷中清峭處如落葉有歸心諸語殊近閬仙高亮處如江聲抱佛樓諸語又極似錢劉要其學力排異一氣轉舒則自讀書之力而又勝得天者

借宿七里溝田家

樹裏一燈明入林間犬吠田家荷鋤歸偶此成酬對陰房
土花斑風窗紙條碎三更亂泉喧微月上牆背不待荒雞
唳車聲響瓜瓞

舟泊浯溪觀顏魯公所書中興頌碑刻歌

營州健兒胡旋舞三郎西走鈴淋雨大唐玉璽日角歸白

衣黃衣擁靈武承平無事李郭閒內家張后外李父道州

刺史攄國憂灑西賊退示官府有時奮筆頌中興涪溪中

開石壁豎歌功象德臣能爲那慚粹美譽皇甫旁有皇甫湜詩石刻

云中行雖富劇粹美君可蓋 崑臺二銘莽荆榛壘令玉筋文無覩黃魯直謂

有崑臺東堂二銘在荆棘中乃江華 平原太守顏清臣下

筆著石如沒羽懸崖突出作覆簷穹碑千載無泐腐滄江

陰雨愁蛟螭古洞荒月走獬豸真成細肌入鷹骨豈但猛

力強牛弩想起挺筆神肅恭冕冠疑立紛紜組我皇神武

玉檢封微臣奏技忝台輔二十四郡鑒臣忠江淮睢陽同

砥柱甯知白首歷三朝令公老去鄴侯拒宮人菩薩裝道

場武士金剛作神主冀魏齊趙迭僭越翻使忠良死僞楚

我來訪古忽涕零摩挲石壁首重俯精光直貫牛斗寒碧
血難蝕土花聚當時誰見端書人野花嘯鳥空沙浦西江
涪翁鬢如絲斷崖僵立指畫肚大書深刻落珠璣已並顏
搗供人取猶云老矣不能爲可惜少游歸黃土名士尙憂
文不傳而況我輩爭腐鼠春蛇秋蚓工未能祈蠶老死等
沙戶嗚呼人生不作顏平原氣掃欃槍蔑貔虎猶當出作
元次山萬口顛連待字撫浪游狂詠等塗鴉文士追隨甯
足數相如不貴復不文封禪遺篇合一炬迴舟堅卧月光
沈夜半寒猿叫枯樹

山家

一峯行過一峯深到得山中日漸沈百道瀑泉穿木杪數
聲嘯鳥背松陰雞豚家慶昇平日藝植人存太古心愧我

風塵猶未息欲攜書劍入雲岑

喜晴

外病兼旬雨復濃聞晴喜欲步村東雙松齊出平林上一
鷺孤明野水中斜插竹竿扶柳起盡挑莎草使渠通數聲
山雀閒庭晚添得園榴葉幾叢

和于滄巖明府東湖曲

鄱湖水長浪花麤東湖清淺漾菰蒲采罷蓮花采蓮子留
郎莫遣出鄱湖

浮舟寺裏木蓮開薦福寺前黃葉堆輪與僧家來往便漁
船纔過酒船迴

去年曾約泛湖游今日花開獨倚樓莫怪歸期還失信信
潮原不到湖頭

湖邊嬌女怯春波欲浣春衣愁奈何不唱洗紅及白紵年
來學得懊儂歌

張秉鈞字平伯丹徒人乾隆癸卯舉人與弟秉銳合編
護壽堂同懷集

寄江上故人

高城一嘯撫刀環客淚揮殘夜雨濤萬派雲濤接巫峽十
年心事負名山湘邊鼓瑟峯初出江上懷人夢乍還卻記
故園相過日讀書門對落花關

西近垂楊閱武堂慣教走馬上圍場呼鷹壯士韝雙絃聞
雁征夫淚一行滿地刀礮閨月冷接天風雨楚臺荒孤身
去國四千里珍重音書遠寄將

李懿曾字漁衫江蘇通州人乾隆癸卯副貢有紫琅山

館詩鈔

詩話漁衫少負才名三中副車考授州判改教職丁卯春謁選都門爲馬踐死極文人之厄邇詩有葆思近體稍弱

尋瘞鶴銘

焦山峭摩空其下則水國誰知懸崖間挂此數行墨愛鶴成鶴瘞鶴死瘞山側鶴本神仙姿魂魄游入極茲銘亦天人人間詎易得或云逸少銘或云貞白刻或云顧逋翁好事競窺測我愛竹垞言必非唐後勒萬古照寒流魚龍不敢蝕我尋潮落時蘚深半不識風濤夜有聲月影松檜黑

于佛嶺

一石嵌一佛一佛占一石碎拆金蓮花亂插雲窩窄想是古先生亦有米顛癖

東坡雜言四卷一
春曉曲效飛卿

汝南雞聲破天黑
棲鳥啞啞林中出
銅槃七尺珊瑚枝
紅淚闌干曉不得
粉壁斜輝淡曙光
博山餘香凝洞房
綃帳微波星靨靨
欲眠不眠穿錦襜
披衣卻立撫象牀
瓊鉤四角垂明璫
玉窗峭風利花箭
杏梁日射芙蓉面
豪犀剔罷春愁生
櫻桃花紅隔簾見

晚晴移詩匯卷一百四終